

EDITORIALE

Laura Mudu, diretora de su giornale nostru “Sardegna Agricola” est, cun mene, coidadosa meda cando chi su mundu nostru dae tempus mi nch’aiat disavesu a custas cosas. Pro custu, a bandas de sas capatzidades professionali suas, finas eo tèngio pro Issa reconnoschèntzia e aprètziu. Gasi, in su tempus, intre nois amus fraigadu un’ammistade chi - a bandas chi mi mutit Presidente, respetosu de su gradu, e a dolu mannu, de s’edade e chi eo la cramo in manera prus cunfiantzosa “Laura” – nos batit dae cando in cando a faeddare pro medas resones e cumbènios.

Gasi Laura at pessadu de donare a su “Presidente” suo s’occasione de iscriere s’editoriale de “Sardegna Agricola”. Primu nùmeru de una sèrie noa, in sa cale su giornale nostru dae provintziale torrat a èssere regionale, comente fiat a cumintzu, in prus arrichidu dae argunas pàginas in limba sarda.

Dae parte mea, no apo pèrdidu s’occasione e duncas so innoghe a ammentare a chie leghet e a mie etotu cosas bellas e de importu de su giornale nostru chi su tempus podet àere anneuladu ma no at a resessire de seguru a iscantzellare.

“Sardegna Agricola” naschit a primos de sos annos ’20, pro bogare a pìgiu sas preguntas de sa massaria sarda, sos problemas chi at dae semper e chi galu bi sunt de su setore nostru, sas isperàntzias de sos impresàrios nostros, limitados in sos disigios issoro dae medas fartas chi gherrant dae semper.

Sustènnidu dae sa passione e dae s’impignu de sos òmines chi in su tempus l’ant guvernadu, custu giornale est arrivadu finas a oe megioradu in sa forma e in sa sustàntzia, inue est possibile. In su tempus est cambiadu su formadu, in logu de su su biancu e nieddu ant postu su colore, est cambiada s’impostazione de sa coberta, de sos titulos e de sos artìculos, ma est abbarrada sa matessi sa resone de cumintzu: sustènnere su setore informende e dende fortza a sos massajos sardos. Non pro nudda in sa coberta si leghet “Organo degli agricoltori della Sardegna”, pro torrare a nàrrere chi pro nois non b’at ligàmenes de appartenèntzia o setores de favorire.

M’apo torradu a biere su nùmeru de nadale de su 1996 in ue b’at, totu intreu, su discursu programàticu chi apo fatu su 13 de su matessi mese, cando so diventadu presidente de s’Unione. L’apo nadu finas in su giornale!

“Su giornaleddu nostru at a dèvere diventare unu giornale a beru: èssere regolare cun sas publicatziones, informare deretu su lettore de cussu chi sutzedit in Bruxelles gasi comente in Regione e ispainare su pessu nostru”.

In sa matessi die, a pustis de medas annos de diretzione apassionada, lassavat dott. Lucio Balata chi nche fiat oramai mannu meda de tempus. Lu sostituìat Carlo Serra, s’erede chi l’at ghiadu finas a pagos meses a como cun sa matessi passione, pro lassare a pustis sa ghia a sa Diretora de como. Lis chèrgio torrare grazias a ambos! Ant fatu bene cando non fiat fàtzile a lu fàghere. E si podo galu astringhere sa manu de Carlo m’acchirat una tristura a s’ammentu de Lucio chi non b’est prus. Dae sos primos annos de “Sardegna Agricola” medas cosas sunt cambiadas, tropus, e non semper in megius. In su sartu b’at tratores mannos in logu de carros tirados dae sos boes; in logu de su trabballu de s’òmine amus postu machinas modernas chi faghent megius e in prus pagu tempus su trabballu e chi, semper e cando, in su matessi tempus faghent aumentare sa disocupatzione; ma

b'at finas unu muntone, tropus, de làcanas, de burocratzia e vùnculos chi minimant e morint su trabballu de su privadu.

Su cambiamentu de sa sotziedade, sas marranias ligadas a sa globalizatzione e sa crisi econòmica chi sighit e non sensat, ponende in crisi unu pagu totu sos trabballos, imponent sèberos fortes a chie guvernare, chi assugietat a vùnculos firmos, a impòitos noos e a gastos difitziles de sustènnere pro unu settore chi dae tropu tempus gherrat pro si mantènnere. Sèberos chi si dimustrant a beru giustos petzi cando naschint dae unu resonamentu cun totu sas partes chi ant interessu, dae unu cunfrontu sèriu cun totu sos operadores de su sistema, dae su cunfrontu medidu de sos interessos chi b'at.

In custu cuntestu su còmputu de chie devet informare est de importu mannu, non petzi pro ispainare sas novas, ma finas e mescamente sas preguntas de sos massajos, chi pedint simplificatzione, agiudu, mercados noos pro bèndere sos produtos issoro e unu minimòngiu giustu, chi sunt isetende dae meda, de sa pressione fiscale.

Sardegna Agricola at semper mandadu a dae in antis custas propostas, non solu pro s'interessu de sa categoria chi rapresentat, ma finas de totu s'economia chi in mesuras diferentes girat e compat dae sa massaria. Isbandonare su trabballu de sa terra ca non rendet prus, non cheret nàrrere petzi a creare disocupados intre sos massajos, ma est finas una pèrdida chi a bellu a bellu pertocat a totus, sas indùstrias, sos profesionistas, sos cumertziantes, e in fines, e mescamente, cheret nàrrere a rinunziare a amparare su territoriu, chi est tentadu dae chie compat dae custu trabballu. Tando diventat galu prus importante chi sa boghe nostra arribet forte e una sola in totu sa Regione, a manera chi sas istitutziones non podant fàghere finta de no l'intèndere e sos massajos sardos iscant chi su giornale nostru aumentat s'impignu pro acumpangiare megius s'àndala issoro. Dae custu nùmeru "Sardegna Agricola" at a esser torrada a ispainare in totu sa Regione, ca sos problemas e sas esigèntzias de sos impresàrios nostros sunt sos matessi, in Casteddu comente in Tatari, Nùgoro e Aristanis. Sas matessi sunt sas isperàntzias de megiorare s'aficu de bida e de torrare a fàghere diventare cumbeniosu su trabballu in su sartu.

At a mudare meda finas s'impostatzione de su giornale, arrichidu dae s'agiudu de sos collegas de sas Uniones provintziales sardas e dae sa Federatzione, cun s'intentzione de dare unu servìtziu semper megius.

Ma eo non m'acuntento mai e tando bos indito su disìgiu meu, isperende chi siat finas su bostru. Apo a èssere cuntentu cando su giornale nostru at a rappresentare non solu su riferimentu de chie s'ocupat de massaria, ma cando at a èssere carculadu dae àteras partes de sa sotziedade, chi podant agatare in sos artìculos e in sas opiniones nostras, seriedade, sabidoria, interessu, non petzi pro sa politica agricola ma pro sos problemas de totu sa sotziedade econòmica, polìtica e tzivile sarda.

Tando podimus andare finas in edicola!

Norabbonas a Laura

Gigi Picciau